



册府元龟
卷之五十三
至五

13
849
20



13
849
20



册府元龜

淮南李嗣京 參閱

西極文翔鳳 訂正

豫章黃國琦 較釋

帝王部 五十三

尚黃老

黃帝曰觀天之道執天之行盡矣老子曰我無為而
民自化我好靜而民自正信所謂知之修練滌除冲
覽拱默垂衣而致治猶龍變化而莫測本其妙用歸
諸自然故乃凝神御變抱一執契無可無不可者矣

册府元龜 帝王部 卷之五十三 乙

自漢之世崇其言於宮壺孝武以降混其術於神仙
或嚴祠於掖庭或講議於斧扆廣設壇醮親受符錄
勝蠻報應與時偕行雖崇奉之至亦未能清淨如此
也唐稱景胄茂暢真氣靈宇相望黃冠交暎尊其虛
無之論列於儒學之科與夫大易神道設教洪範建
用皇極愛民治國之要其歸一揆耳

後漢桓帝延熹八年正月遣中嘗侍左館之若縣祠
老子

十一月使中嘗侍管霸之若縣祠老子

九年七月祠黃老於濯龍宮

文廟為壇飾以金鉛置設華蓋之座用郊天樂

於是百姓稍有奉者後遂轉盛

晉哀帝雅好黃老斷穀餌長生藥

後魏道武好黃老之言誦詠不倦數召諸王及朝臣
親為說之

太武太平真君三年正月甲申帝至道壇親受符籙
法駕旗幟是時道士寇謙之字輔真南雍州刺史讚
之之弟自云寇恂之十三世孫早好仙道有絕俗之
心少修張魯之術服食餌藥歷年無效幽誠上達有
仙人成公興不知何許人至謙之從母家傭賃謙之
嘗觀其姨見興行貌甚強力作不倦請廻賃興代已

使役乃將還令其開舍南棗田謙之於樹下坐筭興
懇發至勤時來看筭謙之謂曰汝但力作何爲看此
二三日後來復看之如此不已後謙之筭十一曜有
所不了惘然自失興謂謙之曰先生何爲不懌謙之
曰我學筭累年而近筭周髀不合以此自愧且非汝
所知何勞問也興曰先生試隨興語布之俄然便決
謙之嘆伏不測興之深淺請師事之興固辭不肯但
求謙之爲弟子未幾謂謙之曰先生有意學道豈能
與興隱遁謙之忻然從之興乃令謙之潔齋三日共
入華山令謙之居一石室自出採藥還謙之食藥不

復饑乃將謙之入嵩山有三重石室令謙之住第二
重歷年興謂謙之曰興出後當有人將藥來但食之
莫爲疑怪尋有人將藥而至皆是毒虫是惡之物謙
之大懼出走興還問狀謙之具對興歎息曰先生未
便得仙止可爲帝王師耳興事謙之七年而謂之曰
興不得久留明日中應去興亡後先生幸爲沐浴自
當有人見迎興乃入第三重石室而卒謙之躬自沐
浴明日中有叩石室者謙之出視見兩童子一持法
服一持鉢及錫杖謙之引入至興尸所興欬然而起
著衣持鉢執杖而去先是有京兆灊城人王胡兒其

叔父亡頗有靈異曾將胡兒致嵩別嶺同行觀望見
金室玉堂有一館尤珍麗空而無人題曰成公興之
館胡兒怪而問之其父曰此是仙人成公興館坐失
火燒七間屋被謫爲寇謙之作弟子七年始知謙之
精誠達通輿乃仙者謫痛而去謙之守志嵩岳精專
不懈以神瑞二年十月乙卯忽遇大神乘雲駕龍導
從百靈仙人玉女左右侍衛集于山頂稱太上老君
謂謙之曰往辛亥年嵩岳嶺靈集仙宮主表天曹稱
自天師張陵去世已來修善之人無所師受嵩岳道
士上谷寇謙之立身置理行合自然才任範首可處

師位吾故來觀汝授汝天師之位賜汝雲中音誦新
科之誡二十卷號曰並進言吾此經誡自天地開闢
以來不傳於世今運數應出汝宣吾新科清整道教
除去三張僞法租米錢稅及男女合氣之術大道清
虛豈有斯事專以禮度爲首而加之以服食閉練使
九疑人長容之等十二人授謙之服氣道引口訣之
法遂得辟穀氣盛體輕顏色殊麗弟子十餘人皆得
其術泰嘗八年十月戊戌有牧土上師李譜文來臨
嵩岳云老君之玄孫昔代郡桑乾以漢武之世得道
爲牧土宮主臨治三十六土人鬼之政地方八十萬

册中元記尚黃老
里有奇蓋歷術一章之數也其中爲方萬里者有三
百六十萬遣弟子宣教云嵩岳所絡廣漢平土方萬
里以授謙之作誥曰吾處天宮敷演真法處法道年
二十二歲除十歲爲童蒙其餘十二年教化雖無大
功且有指授之勞今賜汝遷入內宮大真大寶九州
真師治鬼師治民師繼天師四錄修勤不懈依勞復
遷賜汝天中二真大文錄劾召百神以授弟子文錄
有五等一日陰陽大官二日正府三日正房真官四
日宿官散官五日並進錄生壇位禮拜衣冠儀式各
有差品凡六十餘卷號曰錄圖真經付汝奉持輔佐

北方泰平真君出天宮靜輪之法能興造克就則起
真仙矣又地上生民末劫垂及其中行教甚難但令
男女立壇宇朝夕禮拜若家嚴君功及上世其中能
修身鍊藥學長生之術卽爲真君種民藥別授方銷
鍊金丹雲英玉漿之法皆有訣要上師李君手筆有
數篇其餘皆正真書曹趙道覆所書古文鳥跡篆隸
雜體辭義約辯宛而成章大與世禮相准擇賢推德
信者爲先勤者次之又言二儀之間有三十六天天
之中有三十六宮宮有一主最高者無極至尊次日
大至真尊次天覆地載陰陽真尊次洪正陽尊姓趙

名道隱以殷時得道牧土之來赤松王喬之倫及韓終張世安劉根張陵近世仙者並爲翼從牧土命謙之爲子與群仙結爲徒友幽冥之事世所不了聽謙之具問一二告焉經云佛者昔於西胡得道在四十二天爲延真宮主勇猛苦教故其弟子皆髡形染衣繼絕人道始光初奉其書而獻之世祖乃令謙之止於張曜之所供其食物時朝野聞之若存若亡未全信也崔浩獨異其言因師事之受其法術於是上詠讚明其事曰臣聞聖王受命則有天應而河圖雒書皆寄言於蟲獸之文未若今日人神接對手筆粲然

辭旨深妙自古無比昔漢高雖復英聖四皓猶或耻之不爲屈節今清德隱仙不召自至斯誠陛下俾蹤軒黃應天之符也豈可以世俗嘗談而忽上靈之命臣竊懼之太武欣然乃使謁者奉玉帛牲牢祭嵩岳迎致其餘弟子在山中者於是崇奉天師顯揚新法宣布天下道業大行浩事天師禮拜甚謹人或譏之浩聞之曰昔張釋之爲王生結襪吾雖才非賢哲今奉天師足以不愧於古人矣及嵩高道士四十餘人至遂起天師道場於京城之東南重壇五層遵其新經之制給道士百二十人衣食齋宿祈請六時禮拜

月設厨會數千人太武將討赫連昌太尉長孫嵩難
之太武乃問幽微於謙之對曰必克陛下神武應期
天經下治當以兵定九州後文先武以成太平太平
真君三年謙之奏曰陛下以真君御世建靜輪天宮
之法開古以來未之有也應登受符書以彰聖德太
武從之於是親至道壇受符錄備法駕旗幟畫青以
崇道家之色也自後諸帝每即位皆如之景穆太子
見謙之奏造靜輪宮必令其高不聞鷄鳴狗吠之聲
欲上與天神交接功役萬計經年不成乃言於太武
曰人天道殊卑高定分今謙之欲要以無成之期說

以不然之事財力費損百姓疲勞無乃不可乎必加
其言未若因東山萬仞之上爲功差易太武深然景
穆之言但以崔浩贊成難違其意沉吟者久之乃曰
吾亦知其無成事既爾何惜三五百功九年謙之卒
葬以道士之禮先於未亡謂諸弟子及吾之在汝曹
可求神仙錄吾去之後天宮真難可復遇設會之日
更布二席於上師坐前弟子問其故謙之曰仙官來
是夕卒前一日忽言吾氣息不理腹中大痛而行止
如嘗至明旦便終須臾口中氣狀若煙雲上出空中
至天半乃消尸體引長弟子量之八尺三寸三日已

後稍縮至斂量之長六尺六寸於是諸弟子以爲尸解變化而去不死也時有京兆人常文秀隱於嵩高徵詣京師太武曾問方士金丹事多日可成文秀對曰神仙幽昧變化難測可以闇過難以預期臣昔者受教於先師曾聞其事未之爲也太武以文秀關右豪族風操溫雅言對有方遣與尚書崔曠詣王屋山合丹竟不能就是時方士至者前後數十人河東祁纖好相人太武賢之拜纖上大夫潁陽絳略聞喜吳邵道引修養積年百餘歲神氣不衰嘗農闢平仙傳覽百家之言然不能達其意辭占應對義旨可聽太

武欲授之官終辭不受扶風魯祈連赫連偁子暴虐避地寒山教授子弟數百人好方術少嗜慾河東羅崇從之嘗餌松栢不食五谷自稱受道於條山太武令崇還鄉里立壇祈請黃老云條山有穴與崑崙蓬萊相屬入穴中得見仙人與之往來詔令河東郡給所須從穴行百餘步遂窮後召有司以崇誣罔不道奏治之大武曰崇修道之人豈致欺妄以詐於世或傳聞不審而至於此古之君子進人以禮退人以禮今治之是傷朕待賢之意遂赦之

文成興光元年二月帝至道壇登受圖籙禮畢出赦

京師班賞各有差

獻文天安元年三月辛亥帝幸道壇親受符籙曲赦

京師

時東萊人王道翼少有絕俗之意隱韓山中四十餘年斷粟食萎通達經章書符籙嘗隱居深

山不交世務年六十餘獻文聞而召青州刺史韓頽遣使就山召之翼乃赴都獻文以其仍守本操遂令

增給衣食終身

孝文太和十五年秋詔曰夫至道無形虛象為主自

有漢以來置立壇祠先朝以其至順可歸用立寺宇

昔京城之內居舍尚希今者里宅櫛比人神猥湊非

所以祗崇至法清敬神道可移於都南桑乾之陰岳

山之陽永置其所給戶五十以供齋祀之用仍名爲

崇虛寺可召諸州隱士員滿九十人遷雜移鄴踵如

故事其道場在南郊方二百步以正月七日七月七

日十月五日壇主道士奇人以行拜壇祠之禮

後周武帝天和四年二月帝御大德殿集百僚道士

等討論其藥帝賦詩以記其迹仍勅於師正所居置

隆唐觀及帝營奉天宮特置仙遊門以通師正所止

之谷

唐中宗神龍元年二月制天下諸州各置觀一所咸

以大唐中興爲名

睿宗景雲元年十月制以雒州襄王府宅爲太安國

觀

十二月癸未制曰玄元皇帝朕之始祖無爲所庇不亦遠乎第八女西域公主第九女昌隆公主性安虛白神融皎昧並令入道奉爲天皇天后宜於京城右造觀仍以來年正月令二公主入道

二年正月加銀青光祿大夫行太子率更令史崇玄爲金紫光祿大夫太清觀主

三月癸酉制爲皇女金仙玉真二公主於京城各置一觀仍以金仙玉真爲名

四月手制曰朕聞釋及玄宗理均迹異拯人救俗教

期功齊豈於中間妄生彼我不遵善下之音相高無上之法有殊聖教頗失彝章自今每緣法事集會僧尼道士女冠等宜令齋行並進

玄宗開元八年六月道士葉法善卒制曰故道士鴻臚卿員外置越國公葉法善天真精密妙理幽暢包括祕要發揮靈符固以冥默難原希夷罕測而精栖蓬閣迹混朝伍保黃冠而不拔加紫綬而非榮卓爾孤秀泠然獨往勝氣絕俗真風無塵金骨外聳珠光內映斯乃體應中仙各升上德朕嘗聽政之暇屈詢至道公以理國之法屢奏昌言謀參隱諷事宣弘益

歎徽音之未泯悲形解之俄留何莫愍遺殲良奄及

永惟平昔感愴於懷宜申禮命式賁泉壤可贈越州

都督

法善三世為道士皆有攝養占卜之術高宗聞法善名徵詣京師法善自高宗則天中宗殆五

十年嘗來名山數詔入禁中盡禮問道然排擠佛法議者或譏其何背以其術高終莫之測也睿宗即位稱法善有冥助之功先天二年拜鴻臚卿封越國公仍舊稱為道士止于京師之景龍觀又贈其父為歙州刺史當時尊寵莫與為比年九十卒

九年三月置石柱於景龍觀令天台道士司馬承禎

依蔡邕石柱三體書寫老子道德經

十年正月己丑詔兩京及諸州各置玄元皇帝廟

所並置崇玄學其僧徒令習道德經及莊列文子等

每年准明經例舉送

四月帝夢京師終南山趾有天尊之象求得之於鰲

屋樓觀之側

十四年九月制曰玄元皇帝先聖宗師國家本系昔

草昧之始告受命之期高祖應之遂於神降之所置

廟改縣曰神仙近日廟庭屢彰嘉瑞虔荷靈應祗慶

載深宜令本州擇精誠道士七人於羊角廟中潔齋

焚香以崇奉敬

十八年十月命集賢院學士陳希烈等於三殿講道

德經侍中裴光庭等奏曰堯舜以揖遜而理湯武以

干戈而興或勞神以苦形且役智而焦慮有生之類雖亦聞於小康無爲之風故未臻於大道今陛下化成天下與道玄同小其有爲之迹弘此不言之教將以去華歸本削僞存真其爲道德之鄉固在老莊之術遂命集賢院學士中書舍人陳希烈諫議大夫王迴質侍講學士宗正少卿康子元贊善大夫馮朝隱等於三殿侍講敷暢真文演襄城之七聖及姑山之四子理之於國唯清唯淨之風修之於身久視長生之道聖化玄運寰瀛樂康成日用而不知實曠代之未有臣忝職司望編入史冊宣示天下帝手詔報曰

朕虔守宗祧祗膺曆數夙夜兢惕懼不克勝求賢臣而委之謀猷延學者而資其博洽用扶不逮雅致咸和旣內平而外成且刑清而訟息端拱多暇留意典墳以爲道者玄妙之宗德爲教化之本講諷微旨稽詳秘文庶無爲而政成不宰而物應豈敢比德堯舜論功湯武者哉然必先正其心深思逮於遐邇務惟齊俗亦欲申於兆庶必若同歸清淨共守玄默所陳編示良用多慙

十九年正月壬戌置五岳真君祠廟各於岳下選德行道士數人焚香洒掃焉初司馬承禎隱於天台徵

至京師承禎因上言五岳神祇皆是山林之神非真正之神也五岳皆洞府各有上清真人降任其職山川風雨陰陽氣序是所理焉冠冕章服佐從神仙皆有名數請立齋祠之所帝從其言因敕五岳各置真君祠一所其形像制度皆令承禎推按道經創意爲之

二十年四月己酉勅曰五岳先制真君祠廟朕爲蒼生祈福宜令祭岳使選精誠道士以時設醮及廬山使者青城丈人廟並准此祭醮

二十年正月制曰老子道德經宜令士庶家藏一本

每年貢舉人量減尚書論策一兩條准數加老子策俾尊崇道本弘益化源今之此勅亦宜家置一本每須三省以識朕懷侍中裴光庭等奏曰伏見昨日一敕教示百僚爰及兆庶聖恩博洽德澤如天亦既生成載加誨勗莫不遷善咸知向方臣忝在樞衡未有弘益忽承天獎曠若發蒙雖羲軒上皇堯舜至德無以加也天下幸甚云云望編入國史以示將來從之詔曰玄元之教家國是資匪爲先祖貴申道本所以首歲元日因行春令清淨之政期諸相國乎爲官擇才可以先淳素也

二月逸人張杲就徵張杲不知何許人也則天時隱於條山往來汾晉間時人傳其有延年秘術自云年十千歲堯時爲侍中人莫之辨則天遣使召之杲佯死不赴後人復見之往來鎮州山中鎮州刺史韋濟以狀聞玄宗令通事舍人裴晤往迎之杲對使絕氣如死人之狀良久漸蘇晤不敢逼馳還具奏玄宗又遣中書舍人徐嶠賁璽書以邀迎之杲乃隨嶠至東魯肩輿入宮中玄宗親訪以理道及神仙藥餌之事尋下制曰鎮州張杲先生遊方之外者也跡先高尚心入窈冥足混光塵召至城闕莫詳甲子之數且謂

義皇上人問以道樞盡會宗極今將行朝禮爰升寵命可銀青光祿大夫號曰通玄先生其年請入鎮州賜以衣服及雜絲等便放歸山爲造棲霞觀於隱所十二月侍講學士陳希烈等講書畢黃門侍郎同中書門下平章事裴耀卿等奏曰臣等伏承陛下講讀尚書周易道德莊列畢聖心弘道國訓崇儒玄風遠被更自茲始况以事殷四海念切萬方日午罷朝既披文於內殿風迴問俗亦函文於行宮漢皇乙夜無以過此悟老莊之旨齊物而仁恕以行運堯舜之心稽古則憲章攸備鈞深致遠不疾而速陶鈞庶艱品

物之歡幸實深弘獎大猷簡策之輝光載遠臣等叨陪獻納竊奉音徽慶耀之誠倍百嘗品伏望付史官騰芳盛烈帝手詔報曰尚書雅誥周易精微朕勿奉師資未窮奧義故時令講說耳至乎莊子及道德經遞爲表裏詳其所指觸類繁多既問廣成之道復得方明之相况之今日千載一時故弘斯義以喻卿也編緒簡牘隨卿意焉文武百官尚書左丞相集賢院學士蕭嵩奏曰伏見去年以來有勅令集賢院學士工部侍郎陳希烈諫議大夫王廼貞膳部郎中馮朝隱等每日侍講玄元皇帝道德經及周易尚書莊子

等以今月二十四日講畢臣聞堯放上代之文以成其聖舜觀古人之象以著其明是知道有可尊禮忘於貴不唯聚學將以範人伏惟開元神武皇帝陛下明實天聰舉惟聖作道風允洽文教克成猶尚以廣生知以從積學事必稽古書皆作徵尊祖而習老經體天而觀易象追廣成之說則問以莊篇考唐郊之舊則詳於堯典日者北祠后土東幸溫泉或地涉風涉或天將寒雪而講筵必集帳殿如初足以知好學之志彰克勤之德雖包羲畫卦夏禹受書曷以臻茲臣等忝在朝列預聞帝道伏請宣付史官頒示天下

帝手詔荅曰爰開集賢引進儒道退朝講讀蓋亦其
嘗歲月周施頗尋章句其雅詰則稽之於古以質今
其道真則取之於真不崇其放理國之要可不謂然
乎宜付史官依卿所請

二十二年十月勅曰道家三元誠有科誠朕嘗精意
禱亦久矣而初未蒙福念不在茲今月十四日十五
日是下元齋日都內人應有屠宰令河南尹李適之
勾當惣與贖取其百司諸厨日有肉料亦責數奏來
并百姓間是日並停宰殺漁獵等兼肉料食自今已
後兩都及天下諸州每年正月七月十月元日起十

三至十五兼宜禁斷

二十三年三月癸未親注老子并修疏義八卷及至
開元文字音義三十卷頒示公卿士庶及道釋二門
聽直言可否文武百官右丞相蕭嵩等奏曰臣等准
勅牒問百司并宣示道俗各得報稱咸以為玄言造
微字說該洽刊成代則欽若聖規觀妙知嘗以埏埴
而為體宿疑前失區條流而畢正是以發揮道教弘
長儒風既以化人且聞端本雖旁求異義載佇天心
而四海同文一辭寧措並請編入史冊藏之祕府許
之

六月庚寅嘉州峨眉山醮壇有神燈徧照諸峰群萃成響

二十四年八月庚午都城道士於龍興觀設齋發揚御書道德經上表請降中夜親王宰相及朝官行香并獻蔬食許之九月贈故道士王友真爲銀青光祿大夫

二十五年正月癸未以道士尹愔爲諫議大夫集賢學士兼知史官事特賜朝散階制曰古者置長過之官立司過之史所以書君舉箴王闕不次而受惟才是與道士尹愔識淵微妙心遊淡泊祇服玄元弘敷

聖教雖混萬物獨詣於清真而博綜九流兼通於儒墨方貴無名之朴期不言之化資其妙道寘彼周行宜居納誨之職仍在記言之地愔上表懇讓詔許衣道士服視事愔乃受職

三十六年正月丁丑親迎氣於東郊畢制道釋二門皆爲聖教義歸弘濟禮在遵崇其天下觀寺大小各度十七人簡擇灼然有經業戒行爲鄉閭所推仍先取年高者

二十七年十二月宰臣牛仙客李林甫奏曰臣等伏見皇太子送十一月德音付史官伏承陛下前月五

日將欲巡幸渭北是夜夢玄元皇帝曰明日子欲遊乎北神不在此事宜止五更當自有應且子之享國多年矣何必此日陛下二更便停勅至五更果烈風大起際暮方定伏以玉真體妙莫大於皇極聖明致理孰盛於吾皇繇是感而遂通聖與神合言不測之事示必然之期果茲烈風有叶靈夢既彰陛下之祚更表無疆之休同天地而久長若符契之徵驗臣以上自開闢博考圖書神靈效祥帝王膺慶未有若此之昭著也臣等謬當樞近又忝史官預聞德音不勝乍躍伏望宣示百僚頒及中外帝手詔報曰頃欲渭

北近遊夢中有命神不守職事不可行出必有名何容易也賴玄聖垂告靈應果然朕夙夜驚懷福慶斯在春秋記異况在此乎所請宜依

二十八年五月帝謂宰臣曰朕在藩邸有宅在積善里東南隅宜於此地置玄元皇帝廟及崇玄學二十九年正月詔曰三皇之時兆庶淳朴蓋繇其上以道化人自茲厥後爲政各異我烈祖玄元皇帝稟大賢之德蘊至道之精乃著五千文用矯時弊可以理國家超夫象繫之表出彼明言之外朕有處分令家習此書庶乎人用向方政成不宰慮茲下士未達

微言是以重有發明俾之開悟期弱喪而知復弘善
實於無窮兩京及諸州各置玄元帝帝廟一所每年
依道法齋醮兼置崇玄學於當州縣學士數內均融
量置令習道德經及莊子文子列子待習業成後每
年隨貢舉人例送至省置助教一人委所繇州長官
於諸色人內精加訪擇補授仍稍加優獎是月亳州
奏玄元皇帝廟中之井湧氣成雲五色相映

二月帝謂宰臣曰洪州人鄔玄宗往在文明中傳玄
元皇帝真告於天后曰我國祚無窮當千萬君遂遭
禁錮因茲淪喪自非忠義之士感激過人孰能不避

死亡之誅竟達神靈之命宜與追贈以慰泉壤其子

璵亦依資授一官制曰故洪州人鄔玄宗往者來應

嘉詔次于號略忽覩玄元皇帝俾之升雲空中與言

使戒天后表國祚中興之運示寶曆無疆之期遂能

不顧其身來傳此旨竟遭幽繫諒可傷嗟自非竭節

本朝孰克犯顏茲日宜加追贈用慰幽魂可贈棣州

刺史

三月亳州奏老君廟九井先涸自奉詔增修觀寺九

井皆湧及樹枯復榮

四月漏下後帝謂侍中牛仙客中書令李林甫曰朕

有臨御以來何三十年來未嘗不四更初起具衣服
禮謁尊容蓋爲蒼生祈福也昨十日前禮謁事畢之
後曙色未分端坐靜意有若假寤忽夢見一真容云
吾是汝遠祖吾之形象可三尺餘在京城西南一百
餘里時人都不知年代之數汝但遣人尋求吾自應
見汝當慶流萬葉享祚無窮吾自度其時合吾與汝
興慶中相見汝當大慶吾猶未即言語畢覺後昭昭
然若有所覩朕即命使兼令諸道士相隨於京都西
南求諸果於盩厔縣樓觀東南山阜間乃遇真容一
并迎到便於興慶宮大同殿安置瞻觀與夢中無異

卿等可入觀之仙客林甫俱拜賀上言曰玄元大聖
降見真容感應之徵實符睿德陛下禮至真之道崇
清淨之源何嘗不禮敬虔誠爲蒼生祈福故得真容
入夢列祖表靈求之西南果與夢協且興慶宮者潛
龍舊邸王業所興當此處而告期與嘉名而相會斯
乃降於紫府鎮我皇家啓無疆之休論大慶之應陛
下爰捨正殿以爲法堂是尊是崇至敬至極殊嘗之
禮將萬福而俱臻無外皆覃及億兆而同慶臣等何
幸親詣瞻禮自然相好諒絕名言開闢以來典籍所
載未之有也請宣示中外編諸簡冊帝手詔報曰慶

之正者是謂通神於惟聖容果以誠應豈朕德所及
而大道是興再省神靈言猶在耳將貽福業代紀彌
多初告以行宮乃置之內殿兼之大慶久屬朕躬稽
之道德以茲爲寶當慈育萬姓承荅神明卿等宗臣
宜同朕意願揚嘉應安敢讓焉

五月庚戌帝夢玄元皇帝告以休期命有司圖畫真
容分布天下乃下詔曰大道混成乃先於天地聖人
立教用敷於宗極故能發揮妙本弘濟生靈使秉志
者悟徃迷方者知復以此救物故無棄人其孰當之
粵若我列祖玄元皇帝矣朕纂承寶業重闡玄猷自

爾御以來罔不夙夜滌慮凝想齊心服禮謁於尊容
未明而畢事將三十載矣蓋爲天下蒼生以祈多福
不謂微誠上達宗祖垂鑒頃因假寐或夢真容既覺
之後昭焉以瞻殊相自然與夢相協誠爲密降仙府
永鎮人寰告我以無疆之休德音在聽表我以非嘗
之慶靈貺有期乃吳穹幽贊宗社備休豈朕虛薄能
致茲事若便寢之乃乖祗敬宜令所司即寫真容分
送諸道採訪使令當州道轉送開元觀安置所在道
士等皆具威儀法事迎後象到七日夜設齋行禮仍
各賜錫用克齋慶之費自今已後嘗令講習道德經

以暢微旨所置道學須倍加敦勸使有成益是知真理深遠弘之在人不有激揚何以勵俗諸色人等有明道德經及莊列文子等委所繇長官訪擇具以名聞朕當親試別加甄獎今者真容應見古所未聞福雖始於邦家慶宜均於士庶其親王公王郡縣主及内外文武官等並量賜錢至休假之辰宜以素食用申慶樂諸道節度使及將士等亦惟此其兩京及諸州父老亦量賜錢同此勸宴其錢以當慶官物克伊爾公卿逮乎黎獻宜勉崇玄化共復淳源宣布遐邇通明知朕意戊寅有慶雲見於亳州真源縣玄元皇帝

廟兼有白鶴翔於廟門樓

八月丁亥陵州奏開元觀老君真容見儀象分明道士十數人皆見久之方隱請頒示天下從之甲午命有司於興唐觀設齋自內迎玄元皇帝真容於觀宰臣百官悉行香有慶雲見侍中牛仙客中書令李林甫上表賀日伏以玄元孚祐聖感潛通將垂介福必有丕應須屆初夏微陽暫憇自憂協已來頻降膏澤變茲秋稼成此豐年又數日陰雲通宵澍雨聖容將出天景廓清加以霏煙在天瑞氣捧日元符稠疊若此再三惟呈祖之降靈表吾君以大慶爰自古昔所

未嘗聞臣等何人覩茲明應伏望宣付史官帝曰卿等表言數事皆聖祖啓祐應以隨迎祗顧薄躬對越靈命編於史冊隨卿意焉

九月御興慶門數親試明道德經及莊文列子舉人問策曰朕聽政之暇嘗讀道德經文列莊子其書文約而意精詞高而旨遠可以禮國可以保身朕敦崇其教以左右人也子大夫能從事於此甚盛加之古今異宜文質相變若在宥而不理外物而爲行遂古之化非御今之道適時之術陳其所宜又禮樂刑政所以經邦國聖智仁義所以序人倫使之廢絕未如

其言道德經曰絕學無憂則垂進德修業之教列子力命曰汝奚功於物又違懲惡勸善之文二旨孰非何優何劣文子曰金積折廉壁襲無贏且申其義莊子曰括與支交相養明微其言使一理混同三教兼舉成不易之則副虛佇之懷有姚子彥蘄能元載等策入第各授之以官

十二月勅曰朕每念黎庶無忘餐寤異其家給而足富而且壽仙濟之方莫爲道教大聖垂範微言粲然遵而行之其應何遠况時將獻歲萬物發生旣叶陽和或存惠養宜令天下諸觀起來年正月一日至年

終以來嘗轉本際經其四大齋日每百官齋之日嘗
令講誦庶澤及無外稱朕意焉是年皇太子奏日臣弟兄奉恩旨共造大
玄觀庶憑神力永保聖躬望精選二七人度為道士
七日道實清淨必在人弘念爾等勤誠用依來請
是月亳州奏玄元皇帝廟門之南丁汝璿家有牛忽
變成青牛事符仙瑞請頒示中外許之

册府元龜

淮南李嗣京奏閱

西極文翔鳳訂正

豫章黃國奇裝釋

帝王部 五十四

尚黃老第二

唐玄宗天寶元年正月甲寅陳王府參軍田文秀上
言曰玄元皇帝降見於丹鳳門之通衢告錫靈符在
井喜故宅帝遣使旁求於函谷故關令尹喜臺西一
百三十步發之而得時文武百官及宗子僧道咸上

册府元龜 帝王部

卷之五十四

乙

表以符瑞感通韞匱真寶潛應年號先天不遠願崇
徽號光昭典禮累表入帝固辭不受壬申乃下制曰
神之降休禮無不答永言禋祀必在躬親朕粵自君
臨載弘道教崇清淨之化暢玄元之風庶乎澤及蒼
生時臻壽域積以歲月未嘗懈怠豈謂微誠感通烈
祖降見乃昭靈命是襲寶符因而求之應言而獲亦
既至止果表殊微諒惟祕詞不可詳說然邦國大慶
何以過焉是知神仙所緘造化同固爰初有待經韞
匱而多時潛應改元若符契之相合景福攸介祗畏
良深而群官宗室抗疏於外元良諸子屢請於中逮

夫緇黃兼彼耆老以至懇誠不已前後相仍願加天
寶之名用益開元之號顧惟菲薄曷以當之然則玄
元在乎欽承人心難以推拒順天從衆義協至公敬
依所請實用多愧斯蓋上玄厚載爰及百神孚佑効
靈協於睿祖幽贊惟新之歷克彰永代之祥宜遵記
典式陳昭報以來月十五日禘玄元皇帝廟
二月乙酉置玄元皇帝廟辛卯親享玄元皇帝於新
廟京城斷屠宰是月詔史記古今人表玄元皇帝升
入上聖

三月丙申追號莊子爲南華真人所著書爲南華真

經庚子帝曰莊子號曰南華真人其文列庚桑宜令
中書門下更討論聞奏宰臣李林甫等奏曰莊子既
號南華真人文子請號通玄真人列子號冲虛真人
庚桑號洞虛真人其數子并望隨號稱經從之門下
侍郎陳希烈奏曰臣伏見今年二十日恩制以莊子
號南華真人書曰南華真經然真經所說皆理身之
要發明與義有十萬玄言祖述道經含五千微旨昔
嘗侍講跪演經文至於七篇陛下顧謂臣曰其篇有
養生主已悟長年之術其次有德充符豈無非嘗之
應臣稽首對曰陛下德克於內符應於外發言之後

必有大慶以應之後篇之中所謂應帝王之篇是也
今玄元皇帝果降靈符彰寶祚無疆之福含真人知
來之旨尊以稱謂陳其象設希代之禮曠古未聞臣
於此經宿願深重受持讀誦三十餘年作禮焚香庶
俾神化獲逢殊慶倍百嘗情特望宣付史官以昭靈
應許之

四月戊寅詔曰化之原者曰道道之用者爲德其義
至大非聖人孰能章之昔有周季年代與道喪我烈
祖玄元皇帝乃發明妙本汲引生靈遂著玄經五千
言用救時弊義高象繫理貫希夷非百代之能儔豈

六經之所擬承前習業人等以其卷數非多列在小經之目微言奧旨稱謂殊乖自今已後天下應舉除崇玄學士外自餘所試道德經宜並停仍令所司更詳擇一小經代之其道經爲上經德爲下經庶乎道尊德貴是崇是奉凡在遐邇知朕意焉戊子命有司定玄元廟告享所奏樂太嘗奏降神用混成之樂從之

六月制日大道先於兩儀天地生於萬物是以聖哲之後咸竭其誠今後應緣國家致命表疏簿書及所試制策文章一事已上語指道教之詞及天地乾坤之字者並一切半闕宜宣示中外

九月詔兩京玄元廟改爲太上玄元廟天下准此十月詔曰善利萬物莫先乎大道孚祐兆庶實賴於尊經朕每念黎庶無忘惠養嘗與盡登富壽之域永無凍餒之虞所以去年具有處分令天下諸觀轉本際仙經逮至今秋果聞有歲自非大聖昭應孰臻於此宜令天下道士及女道士等待至今歲轉經訖各於當觀設齋慶讚仍取來年正月一日至年終已來依前轉本際經兼令講說其所設齋度慶亦宜准此庶使遠近蒙福如朕意焉

二年正月追尊玄元皇帝爲大聖祖玄元皇帝爾京崇玄學改爲崇玄館博士爲學士助教爲直學士更置大學士員又義陽郡築玄元皇帝宮獲玉石真人獻之

三月親祠玄元皇帝廟追尊遠祖制曰庇生人者必崇於大道受成命者實賴於前烈恭惟大聖祖玄元皇帝道光太極首出混元弘敷妙門廣運真化雖乘時御氣既超昇於上清而儲祉發祥每孚祐於來裔祚我寶運格於皇天爰自創業迨於茲歲頌彰嘉貺屢覩真容使夫天清地寧物阜人庶六氣時若四夷

來王皆聖祖之感也至道之應也成功不宰豈假於強名降福無疆敢忘於昭報是用薦徽號增禮冊蠲潔以盡敬躬親以致誠意既昭格良深感慶宜因展事更廣揚名夫聖人之生乃先天地應變無體其德猶龍雖冥冥之中初不知誰之子而誕靈之後亦必有先聖祖父母著在圖諫母益壽氏已崇徽號曰先天太后父周正御大夫敬追尊爲先天太皇仍於譙郡置廟自餘事已上准先天太后廟例且聖祖所理本在諸天將欲降靈固宜取象况惟帝號豈可名宮其玄元宮宜爲太清宮西京改爲太清宮東京改爲

太微宮天下諸郡改爲紫極宮兩京宮內道士取先
抽有道行者一七人自餘於新度人中簡擇取添滿
三七人爲定額仍各賜近城莊園各一所並量賜奴
婢等其道士女道士先令司封簡較不須更隸宗正
寺所置崇玄署宜停古人制禮祭用質明義既取於
尚幽情實緣於既歿我聖祖湛然嘗在爲道之宗既
殊有盡之期須展事生之禮自今已後每聖祖宮有
昭告宜改用卯時已前行禮朕深唯復朴將致無爲
嘗恐至理難明玄風未暢不有時習焉能化成自今
已後每至三元日宜令崇玄館學士講道德南華等

諸經群公百辟咸就觀禮庶使軒冕之士盡弘南郭
之風寰海之內咸爲大庭之俗其崇玄館太學士宜

賜物一百疋學士賜六十疋直學士四十疋宮內先

配住道士各二十疋宣布中外令識朕懷初太清宮
威命工人

於太白山采白石爲玄元聖容與玄宗聖容侍立
於玄元右皆依王者袞冕之服繒絲珠玉爲之

五月蘇州刺史鄭長裕奏新作玄元皇帝宮有九井
自然羅列在宮院內差池階宇洞徹嘗盈汲用不竭
窈合譙宮九井之數望宣付史館頒示天下從之

九月譙郡紫極宮宜准西京爲太清宮先天太皇及
太后廟亦並改爲宮

三載三月兩京及天下諸郡於開元觀開元寺以金
銅鑄帝等身天尊及佛各一

四載正月甲子帝於內道場爲兆庶祈福親撰黃素
文登壇其文騰空自飛上天空中有言曰聖壽延長
丁卯皇太子諸王上表賀曰今月六日伏見陛下昭
告上帝陰隲下民勤恤蒼生克成黃素况靈丹神合
祕藥天成聿修增壇奉以行事肅恭展禮飛章騰踊
而入雲虛空有言聖壽靈長而象岳休祐靈感曠古
未聞伏望宣示朝廷錄付史館手詔報曰頃以獻歲
親祠百靈豈精至之上昭而禎祥之屢應神言報休

徵之慶黃素飛雲漢之間皆宗社降靈福流寰宇豈
予微感獨能致之所請宣示朝廷光于史冊者依
二月辛未中書門下奏曰臣等昨十二日因奏事親
奉德音朕以正月甲子日爲萬姓祈福初登壇時疾
風甚勁及行事之際則恬然清謐又朕親撰黃素文
置壇所案上竭誠陳請須臾騰空飛上空中忽聞有
言報朕休徵論蒼生福慶及行禮事畢又風起如初
朕近於嵩山所鍊藥成其時亦置於壇側及夜左右
方欲收藥又空中聞語諸靈官雖已赴大同殿其藥
且未須收此自監守言聲甚厲其左右祗承及道士

等聞者莫不驚悚以達曙之後乃收其藥朕爲蒼生
祈福有此殊應與卿等同慶者臣聞上天之載雖曰
無聲聖人所感必將有應陛下精誠契道深仁被物
親祈介福用濟群生法事既陳疾風旋止聖詞上告
祕錄騰飛遂降神言屢呈昭應始則孚祐下土報黔
庶之和乎終乃垂護靈丹表皇期於萬億人聽所接
神休莫踰希微之地屢有昌言感應之功不惟幽贊
殊祥特異振古未聞諒天意之合符豈山聲之足比
無疆之慶萬國同歡况在微臣實倍嘗品伏望編諸
簡策宣示中外帝手詔報曰朕精修道深爲人祈福

雖則每多昭應若此之殊祥豈聖祖揆予之無私靈
真貺我之誠感遂得休徵之應出自神言勤請之詞
上飛空境永惟虛薄何以當茲然福逮蒼生深爲慰
也所請者依

甲午崇玄館學士門下侍郎陳希烈奏曰伏見太清
宮道士蕭從一云今日五更欲於殿上焚香行至三
清門忽有一片紫雲從空下兼有異嘗音樂忽然如
夢身心驚駭見空中有異人兼仙童玉女謂從者曰
我是玄元皇帝可報吾孫汝是上界真人令侍吾左
右吾冥使天匠就助成就訖長衛護汝受命無疆災

尚黃老
害自除天下安樂言訖隨雲氣便入殿門謹案諸道
士學生皆稱今日凌晨於三清門外見道士蕭從一
鞠恭唱喏三四聲有紫雲及音樂移時不散伏惟陛
下虔誠奉道福祐所歸置玉石真容侍聖祖左右仙
藥下慶天將助成紫雲徘徊移時不散空中有語所
報非嘗言聖壽之延長億萬載之無極伏望宣付史
官帝手詔報日續承丕業遵修玄訓精誠之至與在
希夷寡昧之德寧期昭應恭惟聖祖屢降真容仙衛
接於雲間郊駕迴於天路又賜以無疆之壽且欣以
助成之言嚴奉神休良深祗慶所請者依

四月癸巳詔曰尊祖奉先必在於崇敬辨儀正禮所
貴於緣情伏以大聖祖玄元皇帝御氣升天長生久
視體重玄而不測與元化以無窮真容屢見寶符仍
集恭惟孚祐實表嘗存比太清宮行事官皆具冕服
爰及奏樂未易舊名并告獻之時人陳筴祝既非事
生之禮皆是降生之儀且真俗殊倫幽明異數理有
非便亦在從宜自今後每於太清宮行禮官宜改用
朝服兼停祝版其告獻辭及所奏樂章朕當別自修
撰仍令所司具儀注文奏

七月丁巳蜀郡上言道士鄧紫虛投龍設醮於江潭

有大蛇長一丈自潭遊出文采五色有異嘗蛇其上
又有慶雲紛郁望編諸史冊從之乙卯詔曰王者天
其祖學者父其師義有尊崇情歸孝敬况我玄宗道
要無名象先猶龍莫測昔嘗問禮烹鮮有論歷代攸
尊永惟重玄衆教之父者也朕纘承聖緒祗服玄言
乙夜觀書將求於道雖理歸絕學信無取於筌蹄然
垂代作程義必存乎文字俾之大順亦合禮經其墳
籍中有載玄元皇帝南華等真人猶稱舊號者並宜
改正其餘編錄經義等書亦宜以道德經列諸經之
首其南華經等不須編在子書仍即令集賢院審詳

改定應舊號并科目詔具宣付所司仍頒示中外
五載正月太清宮使門下侍郎陳希烈奏昨二日緣
告獻大聖祖宿齋時日抱戴又今日告限後有紫雲
從殿上起向東南飛光昭清宮色盖仙宇久而不散
二月太清宮使門下侍郎陳希烈奏日謹案高上本
紀太聖祖玄元皇帝以二月十五日降生既是吉辰
即大齋之日請同四月八日佛生日准令休假一日
從之

十二月巴東郡興山縣之巴東公山有石自開其中
有石堂及天尊儀像幢盖侍童皆自然具足

六載正月詔曰崇我祖訓其惟道門將以福助生靈弘
拯天下諸觀道士等如聞人數全少修行多闕其欠少
人處度滿七人並取三十以上灼然有道行經業者克
仍令所繇長官精加試練採訪重覆勿使踰濫度訖
挾名奏聞其諸觀有絕無人處亦度三兩人准此簡

試

七載三月詔曰朕刻意真經虔誠至道既憑玄祐永
錫黔黎每朝禮三清則宵衣忘寢或齋戒一室則蔬
食精專不以勤躬爲儉務以徇物爲心况於宰殺尤
加惻隱自今已後每月十齋日不得輒有宰殺又聞

閭閻之間例有私社皆殺生命以資宴集仁者之心
有所不忍亦宜禁斷又詔曰朕每以道原有屬思竭
精誠經教所在豈忘崇奉且宗其道者師其人行其
教者尊其禮晉瑯琊王公府舍人楊真人護軍長史
許真人丹陽上計掾許真人皆道著妙門感通玄關
降高真之跡爲上清之宗後漢張天師教達元和德
宗太上正一之道幽贊生靈梁中散大夫貞白陶先
生高尚塵表博達玄微綜緝真經俾傳後學並令有
司審定子孫將有封植以嗣真也天師冊爲太師貞
白冊贈太保其天下有洞宮山各置壇祠宇每處度

道士五人并取近山三十戶蠲免租稅差科永供洒掃諸郡有自古得道升仙之處雖先令醮祭猶慮未周每處度道士二人其靈跡殊尤功應遠大者度三人永修香火其茅山紫陽觀取側近百戶太平崇元二觀各一百戶並蠲免租稅差科長充修葺掃洒應天下靈山仙迹並宜禁斷樵採弋獵如聞山林學道之士每被搜括且法之防邪本有所以至於宿處妖訛亡命聚衆誘陷愚人故令禁斷郡縣遂一槩迫逐使至道之士不得安居自今已後審之清潔更不得恐動以廢修行

十二月戊戌聖神玄元皇帝降見於華清宮之朝元閣乃改爲降聖閣改會昌縣爲昭應縣會昌山爲昭應山封山神爲玄德公仍立祠宇以時祭享

八載六月玉芝產於大同殿先是太白山人李渾稱於金星洞仙人見語老君云有玉板石記符聖上長生久視令御史中丞王鉷入山洞求而得之制曰握乾圖者必稟於元命宗道本者允屬於強名是知順物承天諒通昭感之德報功尊祖貴叶崇高之義朕祗荷丕業恭臨大寶何嘗不宵衣滌慮菲食齋心奉玄聖之垂範爲蒼生以祈福自頃吳穹眷命至道降

休玉芝再產真容屢見嘉應薦來罔知攸吝豈謂玄
記陰陽秘牒混成懸微造化之源密紀靈仙之洞慶
崇冥籙昭錫朕躬初驗神傳竟彰天授幽深異吐既
殊於人代朴略其象固絕於名言緬覲皇圖欽承道
寶微旨有屬寅畏增深思申嚴敬之誠以崇久大之
業謹上玄元皇帝號曰聖祖大道玄元皇帝仍以來
月五日朕親奉冊禮

閏六月丙寅帝親謁太清宮上聖祖玄元皇帝尊號
爲聖祖大道玄元皇帝丙辰詔玄宗妙本實備微言
垂範傳學將弘治化朕所以發求道之使遠令搜訪

因聽政之餘親加尋閱既刊訛謬爰正簡編必在闡
揚以敦勸道今內出一切道經宜令崇玄館即繕寫
分道送諸道採訪使令管内諸郡轉寫其官本便留
採訪郡一大觀持誦聖人垂訓蓋先於道學者宗本
必有其師文宣王與聖祖同時俱爲教首雖考言比
德理在難名而問禮叙經迹彰親授恩廣在三之義
用崇得一之尊宜於太微宮聖祖前更立文宣王儀
象與四真人列侍左右且道降真符天有成命藏之
於密則取固名山彰之以類則發祥星洞况靈仙所
集宜表殊休太白山可封爲神應山所繇四時祭祀

其金星洞改爲嘉祥洞所管華陽縣仍一洞置一祠
宇仙人臺下置一觀兩京并十道於一大郡亦宜置
一觀並以真符玉芝爲名每觀度道士七人修持香
火戶部侍郎兼御史中丞王鉷以才受委以忠奉上
頃命精求石記克協神心宜旌乃誠俾正章綬特與
三品其李渾等三人既親傳真誥因獲元符當有甄
命用旌福應宜令中書門下量其所能具狀奏聞是
日大赦制日禘祫之禮以存序位質文之變蓋取隨
時國家系本仙宗業承聖祖重熙累盛既錫無疆之
休合享登神思弘不易之典自今已後每禘祫並於

太清宮聖祖前設位序正上以明陟配之禮欽若玄
宗下以盡虔恭之誠無違至道比來每緣禘祫時享
則停事雖適於從宜禮或虧於必備已後每緣禘祫
其嘗享以素饌三焚香以代三獻

十二月啓聖宮琢玉造聖祖大道玄元皇帝真容及
帝真容

九載正月東京留守上言清河郡人崔以清今載元
日平明於天津橋上忽見紫雲爲蓋五色雲中前有
音樂後有響梵其中有一人着黃衣乘青牛口云我
是太上李老君有天應云三玄在汝本望白馬河南

紫微山上得鼎處南一百五十步火急發取汝帝得之有同三光有四句異言莫傳於人汝自見帝乃可得

二月甲戌吳郡太守林祥上言所部造真符玉芝觀於李樹下發得聖祖尊容不勝大慶請宣付史館許之壬寅華陰郡奏白鶴見於西岳五福峯甘露降大羅峯之醮壇白鹿見於大羅東南峯駕鶴嶺衛叔卿之得仙處請付史官從之

三月丁未詔曰宜於丹陽郡江寧縣簡擇形勝處創置一觀度道士七人委太守精擇灼然有行

名錄奏

十月太白山人王玄翼上言玄元皇帝降見言寶仙洞中有妙寶真符詔刑部尚書王倕等獲之

十一月制曰自今已後每親告獻太微宮改爲朝獻有司行事爲薦獻

十載正月有事於南郊於壇所大赦自今已後攝祭南郊薦獻太清宫薦享太廟其太尉行事前一日於致齋具羽儀鹵簿公卿引入親受祝板乃還清齋所四月帝於內道場親教諸道士步虛聲韻道士玄辨等謝曰臣自九愚生逢大聖服膺真教庇影玄門謬

得侍奉禁闈恭承待問夙夜兢惕將何克堪伏見陛下親教步虛及諸聲讚以至明之獨覽斷歷代之傳疑定麟驥於海陸分景鏡於真僞平上去入則備體於正聲吟諷抑揚則宛仍於舊韻使詠之者審分明之旨聞之者無譌舛之嫌妙協鈞天克諧仙唱伏以靈章本趣理固如然但爲流傳人間訛謬滋久非應道之主孰能正之是可以振暢玄風發揮聖作臣忝趨仙禁預聽正聲欣戴之誠倍萬嘗品特賜編諸史冊宣示中外帝曰一時之事何足言焉所請者依六月戊辰中書門下奏曰臣等昨於勤政樓下叙立

恭聞德音今日又道門威儀王虛真奉宣聖意伏承陛下奉爲五聖寫一切道德經五本於太清宮興唐東明龍興觀各置一本仍各賜絹五百疋以申慶齋臣等伏以至理本乎無爲乃隱言以演教孝思存乎追遠必精意以報親陛下欽崇道元虔奉先聖更抒睿思刊定真經玉軸瓊輪旣懸之於日月玄宗與旨方下濟於雲霄罔極之情因心知至無疆之福有感必通式明孝經之誠更闡上皇之化卽知北極之字期悟俗於群迷南薰之風思濟人於壽域凡在士庶孰不歡欣臣等謬列台司幸叨宮使感悅之極實萬

嘗情無任忭躍之至望宣示朝廷編諸史冊手詔報
曰朕躬承丕業稟訓玄宗霜露永懷感思罔極伏以
三清設教五聖在天克奉先靈同心薦福今玉版瓊
章傳之洞府雲囊縹帙列在仙宗庶以展永慕之心
兼以播淳風之化編於簡冊實用愧焉乙亥中書門
下奏曰臣等今日因奏事伏承昨日辰時大同殿前
鐘樓上忽聞鐘聲其殿院嘗扃閉內更無人即令檢
覆其鐘樓門及殿院門皆閉須臾其鐘又鳴如此者
三度聞鐘聲響六十下其聲清徹特異人間左右侍
臣及女道士等皆聞伏以至順通微蘊虛無以爲用

虔誠上達應精感以交符陛下端拱清穆欽崇道寶
尊玉皇之像未明而朝謁寫群經之字乙夜而玄覽
雖高居於紫極嘗屬念於群生故得契協希夷跡多
靈異雖仙樓未啓而神鐘自鳴不俟鯨魚之擊徹嚮
於雲漢宛同鸞鳳之音諧韻于金石實表群仙效祉
玄祖呈祥遍圖牒而罕傳貫古今而未有臣等幸參
近侍竊聽休徵欣躍之誠實萬嘗品無任慶忭之至
謹奉狀陳賀以聞仍請宣示中外編諸史冊帝手詔
曰朕齋心大同緬覲真蹟豈精誠遠感而休應薦臻
今九華之鐘三清徹嚮聲聞金石氣含虛無是知紫

宸之宮雲輶降集青童之府烟景來遊將合律於雲
璈表同和於陰則靈仙坐接福壽昭然永惟嘉祥良
深慶慰所請依

八月黔中郡上言紫極宮慶雲見斬春郡上言天長
觀聖容玉石蓮華座上產紫芝一本七莖

十三載二月親獻太清宮上聖祖玄元皇帝尊號曰
大聖祖高上大道金闕玄元天皇大帝又詔太清宮
闕聖祖仙居頌告休徵屢貽啓迪不有優異豈表殊
常其本宮道士宜各賜物三十段道門威儀王虛真
賜物五十段陪位大德各賜物二十段

十四載四月道士王虛真卒贈洞微先生虛真東明
觀道士以錄得見帝方崇玄言頗重之得爲道門威
儀翰林供奉賜紫帔監領諸道士及卒帝甚悼之
十月御注道德經並義疏分示十道各令巡內傳寫
以付宮觀

十五載九月帝在蜀令道士於丈人廟修醮壇有蛇
見於廟前頭有兩角山上明燈自然明照

肅宗至德二年庚午通化郡上言玄元皇帝真容見
十二月詔天柱山老君廟改爲啓聖宮

乾元元年二月旱於曲江池投龍祈雨又令道士何

智通於尚書省都堂醮土神用特性設五十餘座右
僕射裴冕及尚書侍郎官並就位如朝儀

四月丁未內出皇帝寫真圖自光順門送太清宮諸
觀道上都人皆以棚車幡花鼓樂迎送

二年十一月殿中監成國公李輔國奏大明宮三殿
前設河圖羅天大醮其夜及晨有龍見於御座褥宛
轉鱗甲脚迹遍於褥上以其褥示朝臣

上元二年七月癸巳於景龍觀設高座講論道釋二
教丁酉遣公卿百寮悉就觀設醮講論自宰臣以下
賜錢有差

九月詔曰國之大事郊祀爲先貴其至誠不美名品
黍稷雖設猶或非馨牲牢空多未爲能享今以玄元
孚祐至道爲心將臻太和不欲多殺禮樂殊制孝敬
同歸圓丘方澤任依嘗享薦宗廟祭祀但臨時獻熟用
懷明德之馨庶合西隣之祭

代宗寶應二年七月壬寅群臣上尊號壬子大赦改
元制河南河北僞度僧尼道士女冠並與正度
大曆三年七月增置崇玄生員滿百員

七年二月光天觀道士簡較殿中監冲虛先生申甫
上言請下制誠天下道士增修道法許之四月申甫

又上言玄真觀開元觀望天觀並載先帝聖謚請至
請日各于其觀行香從之

八年正月乙未勅天下寺觀僧尼道士不滿七人者
宜度滿七人三十以上者更度一七人二七以下者
更度三人

九年四月丙戌肅宗忌日度尼僧道士凡二百餘人
十一月潤州上元縣石頭城新置大曆太乙之觀選
道士七人住持

十二年十二月詔天下仙洞靈跡之處禁樵蘇
十三年乙巳新作乾元觀置道士四十九人以追遠

祈福上資肅宗也其地在皇城南長興里本涇原節
度使馬璘之宅璘初創建是宅重價募天下巧工營
繕屋宇宏麗冠絕當時璘將卒抗表獻之帝方軫懷
罔極欽崇道福以其當皇城形勝之地墻宇新潔遂
命爲觀加乾元名焉先皇尊號也仍遣道門威儀申
甫司其事

德宗貞元五年三月詔曰釋道二教福利群生館宇
經行必資嚴潔自今州府寺觀不得俗客居住屋宇
破壞各隨事修葺

憲宗元和二年正月己酉朔親薦獻于太清宮

八年七月命中尉彭忠獻師徒三百人修興唐觀賜錢十萬使壯其舊制其觀北距禁城因是開複道爲行幸之所又以內庫絹千疋茶千斤爲興唐觀城複道夫役之賜又以莊宅錢五十萬雜穀千石克修道教之費

九年二月內出道教神仙圖像經法九輦以賜興唐觀

穆宗長慶三年十二月以內庫錢一百貫賜太清宮道士人一千

敬宗寶曆元年七月命左僕射平章事李逢吉攝太

尉克孟秋薦獻大聖祖于太清宮

八月癸丑幸蓬萊殿會沙門道士共四百人賜食兼給茶絹有差已巳以道士劉從政爲簡較光祿少卿賜紫并號昇玄先生

十月命中書侍郎平章事李程攝太尉克孟冬薦獻大聖祖于太清宮

十二月命中書侍郎平章事實易直攝太尉克季冬奏祥瑞于太清宮

二年三月戊辰命興唐觀道士孫準入翰林

五月賜浙江送到絕粒女道士施子微紫衣一襲絹六

百疋銀器二百事命中使却送歸本州帝前後累訪
貞隱唯子微粗有修養之術故其去也獲厚賜焉癸
未命內官張士清押領光順門進狀山人杜景先赴
淮南浙西江東湖南嶺南等道訪求藥術之士仍送
景先衣一襲絹三十疋甲午賜興唐觀錢二萬貫充
道士劉從政脩院

九月庚午命兩街供奉道士趙嘗盈等四十人於三
清殿修羅天大醮道場

十月丙寅以太清宮道士趙歸真充兩街道門都教
授博士

文宗太和七年八月戊子詔曰聖人立極教本奉先
王者配天義惟尊祖我太祖玄元皇帝肇開寶運垂
祚有唐致六合於大同濟群生於壽域保茲鴻業實
賴貽謀如聞亳州太清宮類經水潦頗以摧毀永惟
誕聖之地敢忘崇奉之誠宜令宣武軍節度使李程
兼充亳州太清宮使仍委漸加修葺以時致敬稱朕
意焉

開成二年正月召麻姑山女道士龐德祖自錄臺門
留止玉晨觀

武宗以開成五年正月即位二月勅三月十五日玄

元皇帝降生日宜爲降聖節休假三日
會昌六年中書門下奏東都太微宮初成玄元皇帝
玉聖容玄宗肅宗皇帝玉真容已令移就位請差右
散騎嘗侍裴泰章充使陳薦維新之意

哀帝天祐二年四月太清宮使柳璨奏修上清宮畢
請改爲太清宮從之詔曰玄元皇帝肇基聖緒敷祐
神孫璿派靈長共乾坤而莫極瑤圖貞固與日月而
無窮是以我朝追崇奕葉昭祀禮因尊祖爰陳恭敬
之文事匪求真且異虛無之旨比者如九廟別置
一宮東遷以來欲修奉而未暇北觀之內遂薦享以

從宜每備案盛靡稽故實祝史正辭而追遠雖屬猶
龍宰臣肅拜于當陽如求罔象徒陳玉學莫對瓊儀
璨練達舊章振舉重職爰思改作頗謂協宜庶不憊
而不忘致來格而來享又尋玄圃如得瀨鄉古殿密
清喬木蔭翳可以仰規紫府便號清宮捨短從長斯
爲智士尋源正始實賴賢臣合議允俞殊可嘉獎
十月司天臺奏星文變見請於太清宮建黃籙道場
從之

三年六月辛卯太微宮使柳璨奏前使裴樞克宮使
日權奏請玄元觀改爲太清觀又別奏在京弘道觀

爲太清宮至今未有制置伏以今年十月九日陛下親事郊禮先謁聖祖廟弘道觀既未修葺玄元觀又在北山若車駕出城禮非便穩今欲只留北邨山老君廟一所其玄元觀請折入都城於清化坊內建置太微宮則車駕行事得禮從之

後唐莊宗同光三年五月帝出師北門請雨於聖祖玄元廟

明宗天成二年八月左輔闕趙明吉上言曰竊見天下宮觀久失崇修蓋自朱溫篡逆以來例多毀廢請下諸道應本朝舊置宮觀近經毀折者皆勅修增以

奉祖宗以弘孝治光陛下中興之業顯國家大道之源復我眞宗貞茲永世其兩京宮觀有公田乞免科索俾充齋糧以給正名道士庶懇志焚修香火期上玄之福祐

九月宗政卿李寶上言四方凡有玄元皇帝宮殿處請依修飾從之

三年正月中書奏假寧令二月十五日玄元皇帝降聖節休假三日準會昌元年二月勅休假一日伏請准近勅從之

四年十二月壬子勅尊崇聖祖修飾道宮既復其名

固難無額宜令所司依舊造上清宮牌額懸掛兼京城內金真觀仍改名崇道觀亦准上給換牌額以老君廟久無牌額故也

長興四年七月帝遣和小康召道士二十人於中興殿爲金籙醮七日而罷

末帝清泰元年七月詔河中修五老觀

晉高祖天福四年五月庚辰廢華清觀爲靈泉觀

九月辛卯召道士崇真大師張薦明錫以繒帛薦明燕人也少爲儒遊學河朔漁獵莊老故性與道俱其後雲衣星冠奉自然之教帝素尚玄元御極之初數

數召見帝問曰道可以治世乎薦明對曰道也者妙萬物而爲言摠兩儀而稱德得之上者爲道得之中者爲仁義得之外者爲禮智信外而失之非人也得其極者尸居衽席之間以治天下豈止乎世者也帝遂延入內殿講老氏道德經召宰臣馮道授卷而聽道曰道士講老子僧人受戒令文有之不可輕也帝遂禮之爲師益加崇重嘗聞宮中奏時鼓乃曰陛下聞鼓聲乎守一而已夫絃匏金石其聲十二其黃鍾也唯合於黃鍾其不應者五十有九出乎多門也鼓之爲音也奚其間然無宮商無角徵無羽無變和而

契之其一故也人能混成於心則天地俱矣何患世之不淳哉帝繇是虚心致靜尊道貴德故每一召見多所頒賜

五年十一月賜張薦明號通玄先生令以道德二經雕上印板命學士和凝別撰新序冠于卷首俾頒行天下

漢隱帝乾祐三年右補闕蘇德潛上言臣聞道以至真爲本自然爲宗若不離嗜慾之源則安奏虛無之理况兩京道宮是國家崇福之地竊見道場所設齋醮無非蠲潔淨筵蓋表其精虔也訪聞道士皆有妻

孥携在道宮君止不獨傷於教法其實汙於清虛望特行禁止勅宜令御史臺嚴加告諭不得更然

周世宗顯德三年十一月命送華州道士陳搏復歸本州帝好黃白術有人以搏名奏者命華州送至闕下館于內庭居月餘凡所咨詢靡聞於外內放還所止仍令本州以時存省

五年六月內出御衣六百餘事錢四十萬羅縠百疋分賜兩街僧道令增修寺觀

六年二月幸太清觀觀所賜鐘焉先是於乾明門外新修太清觀既成帝聞濮州有一鐘其聲甚樞每擊

之聞數十里乃命徙之以賜是觀至是故往觀焉

冊府元龜

尚黃老

卷之五十五

冊府元龜

淮南李嗣京

西極文翔鳳

豫章黃國琦

帝王部

五十五

養老

禮曰年之貴乎天下久矣故有虞氏養老以燕禮夏后氏以饗禮商人以食禮周人脩而兼用之必以八月諸物老成順其時氣以助養育天子袒而割牲侯王設醬公卿饌珍所以老窮不遺疆不犯弱衆不暴

冊府元龜

帝王部

卷之五十五

乙

寡明長幼之序與揖讓之風習鄉上齒之義備矣隆
及後世巡省風俗則先問高年時臨舊都乃宴衍故
老或賜飲於端闕或迴輿於私室而又因靈休之集
畢嘉祀之禮則錫以鳩杖賁之束帛登板授之職關
石窳之封此皆介于景福終之以仁斯教化之大本
盛王之令典也流於惇史豈不美歟

帝舜養國老於上庠養庶老於下庠

夏后氏養國老於東序養庶老於西序

殷湯養國老於右學養庶老於左學

周文王為西伯制其田里教之樹畜導其妻子使養

其老五十非帛不煖七十非肉不飽不煖不飽謂之
凍餒文王之民無凍餒之老者此之謂也

漢文帝元年三月詔曰老者非帛不煖非肉不飽今

歲首不時使人存問老幼存省祝也又無布帛酒肉之賜

將何以使天下子孫孝養其親今聞吏稟當受粥者

或以陳粟稟給也粥淖糜也給米使為糜粥也陳豈
久舊也小雅甫田之詩曰我取其陳

稱養老之意哉具為令使其備有司請令縣道或縣
為條制

皆用此制也年八十以上賜米人月一石肉二十斤

酒五斛其九十已上人賜帛二疋絮三斤絮綿也賜物

及當稟粥米者長吏閱視丞若尉致長吏縣之令長
也若者豫及之

詞致者送至也或丞或尉自致之也不滿九十嗇夫令史致二千石遣

都吏循行都吏今督郵是也不稱者督之循行有不如詔者二千石察視責

之罰刑者及罪有耐以上不用此令一歲為罰作二歲刑以上為耐之能

任其罪也又曰刑為先被刑也有罪在吏未決者言八十九十之人雖合加賜其中有被刑罪者不在此

賜物令條中也

武帝建元元年二月赦天下民年八十復二等九十

復甲卒二等級復二口之等也復甲卒不預革車之賦也

四月詔曰古之立教鄉里以齒朝廷以爵扶世道民

莫善於德然即於鄉里先者艾奉高年古之道也今

天下孝子順孫願自竭盡以承其親外迫公事內乏

資財是以孝心闕焉朕甚哀之民年九十以上以有

受粥法給米粟以為糜粥為復子若孫令得身帥妻妾遂其

供養之事若者豫及之詞也有子即復子無子即復孫也遂申也

元狩元年四月赦天下賜民年九十以上帛人二疋

絮三斤八十以上米人三石

元封元年登封太山還詔行所巡至七十以上帛人

二疋

宣帝地節三年三月詔賜高年帛

元康元年三月以鳳凰集泰山賜三老帛

二年三月以鳳凰甘露降集賜天下高年帛

三年春以神爵集泰山賜天下高年帛

四年三月詔以迺者神爵嘉祥賜三老帛人各二疋

神爵元年三月祠后土賜天下高年帛

四年二月詔以迺者鳳凰甘露降及神爵集賜天下

高年帛

五鳳二年三月鸞鳳集賜高年帛

甘露二年正月赦天下賜高年帛

三年詔以迺者鳳凰集新蔡賜新蔡三老帛

元帝初元元年四月賜三老帛

四年祠后土赦汾陽賜高年帛

五年四月賜三老帛人五疋

永光元年正月郊泰畤賜雲陽高年帛

三月赦天下賜高年帛

二年二月赦天下賜天下三老帛

建昭五年二月賜三老帛

成帝建始元年賜三老錢帛

鴻嘉元年二月賜天下高年帛

元始四年正月行幸其泉賜高年帛

哀帝以綏和二年四月即位赦天下賜三老帛

平帝元始元年詔天下吏比二千石已上年老致仕

者參分故祿以一與之終其身

四年二月大赦賜天下高年帛

後漢明帝永平二年十月壬子幸辟雍初行養老之

禮詔日光武皇帝建三朝之禮而未及臨饗三朝謂明堂辟

雍靈臺也眇眇小子屬當聖業眇眇猶微微也間暮春吉辰初行

大射今月元日復踐辟雍尊事三老兄事五更安車

輶輪供綏執授侯王設醬公卿饌珍朕親祖割執爵

而漱字本作酉從音與太祖廟諱下字音同祝哽在前祝噎在後老人食多

哽咽故置人於前後祝之令其不哽噎也升歌鹿鳴下管新宮八佾具儀

萬舞於庭朕固薄德何以克當易陳負乘詩刺彼已

永念慙疚無忘厥心三老李躬年耆學明五更桓榮

授朕尚書詩日無德不報無言不酬其賜榮爵關內

侯食邑五千戶三老五更皆以二千石祿養終厥身

其賜天下三老酒人一石肉四十斤有司其存者耄

卹幼孤惠鰥寡稱朕意焉

三年二月立皇太子賜三老爵三級

八年十月臨辟雍養三老五更

十二年五月賜天下三老爵人三級

十七年五月賜天下三老爵人三級

章帝建初二年冬行饗禮以故司空伏恭為三老侍

中騎都尉周澤為五更

三年立皇后賜三老爵人三級

四年四月立皇太子賜三老爵人三級

七年九月幸鄴賜三老錢

元和二年二月耕於定陶詔曰三老尊年也其賜帛人一疋五月詔賜天下高年爵三級

章和元年七月詔曰秋令是月養衰老授几杖行糜

粥飲食月令中秋之令其賜高年二人共布帛各一疋以為

醴酪

和帝永光元年十月幸長安詔賜行所過三老錢帛

四年八月賜三老爵人三級

十二年三月賜三老爵人三級

十五年九月南巡賜所過三老官屬及民百年者錢

帛

元興元年十二月賜天下三老爵人三級

安帝永初三年正月加元服賜三老爵人三級

元初四年七月詔日月令仲秋養衰老授几杖行糜

粥方今案比之時邵縣不奉行雖有糜粥糠粃相半

長吏怠事莫有躬親甚違詔書養老之意其務崇仁

恕賑護寡獨稱朕意焉

延光元年三月改元赦賜三老爵三級

李充為左中郎將年八十以為國三老帝嘗特進見賜以几杖

順帝永建元年正月大赦賜三老爵三級

四年帝加元服賜三老爵人三級

陽嘉元年正月立皇后賜三老爵人三級

三年五月大赦賜民間年八十以上米一斛肉二十斤酒五斗九十以上加賜帛人二疋絮三斤

桓帝建和元年正月大赦賜三老爵三級

二年正月甲子加元服大赦年八十以上米酒肉九

十以上加帛二疋綿三斤

永興二年十一月校獵賜所過道傍年九十以上錢

各有差

靈帝光和元年冬行辟雍禮以光祿大夫楊賜為三老

魏文帝黃初中蘇林為博士給事中帝作典論所稱蘇林者是也以老歸第國家每遣人就問之數加賜遺年八十餘卒

高貴鄉公甘露三年八月詔曰夫養老興教三代所以樹風化垂不朽也必有三老五更以崇至敬乞言

納誨著在惇史然後六合承流下觀而化宜妙簡德
行以克其選關內侯王祥履仁秉義雅志淳固關內
侯鄭小同温恭孝友帥禮不忒其以祥為三老小同
為五更車駕親率群司躬行古禮焉

漢晉春秋曰帝乞言於祥祥對曰昔者明王禮樂既備化之以忠誠忠誠之發行於人乎言行夫大人者言行動乎天地天且弗違况於人乎臣欽若等曰按晉書志二人行養老禮

晉惠帝永平元年五月賜高年帛人三疋

永興元年三月大赦賜高年帛三疋

明帝太寧三年閏二月即位賜孤老帛人二疋

成帝咸和元年二月大赦改元賜孤老米人二斛

孝武太和五年六月賜孤老不能自存者米人五斛

後魏太武時居虵侯羅結年百七歲為長秋卿後年

一百一十詔聽歸老賜大甯東川以為居業并築城

即號曰羅侯城朝廷每有大事騎馬詢訪焉

文成和平二年三月幸中山至於鄴遂幸信都輿駕

所過皆親封高年間民疾苦民年八十以上一子不

從役

四年二月賜京師民年七十以上太官厨食以終其

年

孝文延興三年十一月賜高年布帛

太和元年十月詔七十以上一子不從役又宴京邑耆老於太華殿賜以衣服

三年五月詔曰昔四代養老問道乞言朕雖冲昧每尚其美今賜國老各衣一襲綿五斤絹布各五疋

四年七月改作東明觀詔會京師耆老賜錦綵衣服儿杖稻米蜜麵復家人不徭役

六年三月幸武州山石窟寺賜貧老者衣服

十五年八月議養老

十六年二月賜京邑老人鳩杖八月司徒尉元以老遜位以元爲三老以前鴻臚卿游明根爲五更詔曰

夫大道凝虛至德冲挹故后王法玄猷以御世聖人崇謙光而隆美是以天子父事三老兄事五更所以順孝悌於萬國垂教本於天下自非道高識博孰能處之是以五帝憲德三王乞言若求備一人同之古哲叔世之老孰能克堪師上聖則難爲其舉傳中庸則易爲其選朕既庸寡德謝曩哲老更之選差可有之前司徒山陽郡公尉元前大鴻臚卿新太伯游明根並元亨利貞明允誠素少著英風老敷雅迹位顯台宿終歸私第可謂知始知卒希世之賢也公以八十之年宜處三老之重卿以七十之齡可充五更之

選於是養三老五更於明堂國老庶老於階下帝再拜三老親袒割牲執爵而饋於五更行肅拜之禮賜國老庶老衣服有差既而元言曰自天地分判五行施用人之所崇莫重於孝順然五孝六順天地之所先願陛下重之以化四方臣既年衰不究遠趣心耳所及敢不盡誠帝曰孝順之道天地之經今承三老明言銘之於懷明根言曰夫至孝通靈至順感幽孝順之道無所不格願陛下念之以濟黎庶臣年志朽癡識見昧然在心之慮不敢不盡帝曰五更助三老以言至範敷展德音當克已復禮以遵所授禮畢乃

賜步輓一乘詔曰夫尊老尚夏列聖同政欽年敬德緝哲齊軌朕雖道謝玄風識昧庸劣然仰稟先誨全遵猷旨故推老以德立更以元父焉斯彰兄焉斯顯矣前司徒公元前鴻臚卿明根並以克德懸車懿量歸老故尊公以三事更以五雖老更非官耄耄罔祿然稟事既高宜加殊養三老可給上公之祿五更可食元卿之俸供養之味亦同其列其後車駕幸鄴明根朝於行宮詔曰游五更養素蓬簷歸終衡里可謂朝之舊德國之老成可賜帛五百疋穀五百斛勅大官備送珍羞後車駕幸鄴又朝行宮賜穀帛如前爲

造甲第國有大事常璽書訪之舊癩發動手詔問疾
太醫送藥時奚護為外都大官詔以護年邁既未致
仕令依舊養老之例

十七年八月帝南伐至泗州民年七十以上賜爵一
級

九月濟河詔雒懷并泗所過四州之民百年以上假
縣令九十以上賜爵三級八十以上賜爵二級七十
以上賜爵一級

十八年正月帝南巡詔相充豫三州百年以上假縣
令九十以上賜爵二級七十以上賜爵一級孤老不

能自存者賜粟五石帛二疋

八月丙寅詔六鎮及禦夷城人年八十以上而無子
孫兄弟終身給其廩粟七十以上家貧者各賜粟十

斛

十一月辛未詔冀定二州民百年以上假以縣令九
十以上賜爵三級八十以上賜爵二級七十以上賜
爵一級

十二月丁卯詔郢豫二州之民百齡以上假縣令九
十以上賜爵三級八十以上賜爵二級七十以上賜
爵一級鰥老不能自存賜以穀帛

十九年四月幸彭城賜百歲以上假縣令九十以上賜爵三級八十以上賜爵二級七十以上賜爵一級老疾不能自存者賜穀帛

六月帝自伐齊迴車駕所經百年以上賜假縣令九十以上賜爵三級八十以上賜爵二級七十以上賜爵一級孤老不能自存者賜以穀帛

十月出赦相州民百年以上假郡守九十以上假縣令八十以上賜爵三級七十以上賜爵二級孤老不能自存者賜以穀帛

二十年二月詔畿內七十以上暮春赴京師將行養

老之禮

三月宴群臣及國老庶老於華林園詔曰國老黃耆以上假中散大夫郡守耆年以上假給事中縣令庶老直假郡縣名賜鳩杖衣裳

二十一年二月詔并州士人年六十以上假以郡守三月詔汾州民百年以上假縣令九十以上賜爵三級八十以上賜爵二級七十以上賜爵一級

五月泛渭入河詔雍州士人百年以上假華郡太守九十以上假荒郡八十以上假華縣七十以上假荒縣庶老以年各減一等七十以上賜爵三級時裴安

祖爲河東州主管後閒居養志不出城邑帝幸長安至河東存訪故老安祖朝於蒲坂帝與語甚悅仍拜安邑令安祖以老病固辭詔給一時俸以供湯藥焉宣武景明三年八月以前大傅平陽公丕爲三老孝明熙平二年四月詔京尹所統百年以上賜大郡板九十以上賜小郡板神龜元年正月詔京畿百年以上給大郡板九十以上給小郡板八十以上給大縣板九十以上給小縣板諸州百姓百歲以上給小郡板九十以上給上縣板八十以上給中縣板

正光四年七月詔曰達尊斯在齒預一焉崇敬黃耆先代通訓故方叔以元老處位充國緣自強見留雖七十致仕明乎典故然以德尚壯許其繫維今庶寮之中或年迫懸車循禮宜退但少收其力老弃其身言念勲舊眷然未忍或戴白在朝未嘗外任或停私歷紀甫授考級如此之徒雖滿七十聽其蒞民以終嘗限或新鮮縣吏或外任私停已滿七十方求更叙者吏部可依令聞奏其有高名峻德老成髦士灼然顯達爲時所知者不拘斯例若才非秀異見在朝官依令合解者可給本官半祿以終其身使辭朝之叟

不恨歸於閭巷矣

孝莊建義元年五月詔上黨百年以下九十以上板
三品郡八十以上四品郡七十以上五品郡

後周明帝武成二年六月己巳板授高年刺史守令
各有差

武帝保定元年正月甲戌詔先經有職官年六十以
上及民年七十以上節級板授官

三年四月幸太學以太傅燕國公于謹爲三老以食
之三老入門帝迎拜門屏之間三老答拜有司設三
老席於中楹南向大師晉公護升陛設几於席三老

升席南面憑几而坐以師道自居大司寇楚公寧升
陛正舄帝升立於斧袞之間西面有司進饌帝跪設
醬豆親袒割三老食訖帝又親跪受爵以漱有司撤
訖帝北面立訪道三老乃起立於帝後帝曰猥當天
下重任自惟不才不知正治之要公其誨之三老答
曰木受繩則正后從諫則聖自古明王聖主皆虛心
納諫以知得失天下乃安惟陛下念之又曰爲國之
本在乎忠信是以古人云去食去兵信不可失國家
興廢莫不繇之願陛下守而勿失又曰治國之道必
須有法法者國之綱紀綱紀不可不正正之之道在

於賞罰而已若有功不賞有罪不罰則天下善惡不分人無所措手足矣三老言畢帝再拜受答拜焉禮成而出

七月丁丑幸津門問百年賜錢帛又賜板授有差

建德二年詔曰尊年尚齒列代弘規序舊酌勞哲王明範朕嗣承洪業君臨萬邦驅彼兆庶寘諸仁壽軍民之間年多耆耄眷言衰暮宜有優崇可頒受老職使榮沾邑里

宣帝時柱國闡慶於武帝朝抗表致仕慶既衰老嘗嬰沉痾帝以其先朝耆舊特異嘗倫乃詔靜帝至第

問疾賜布帛千段醫藥所須令有司供給大象二年拜上柱國

隋文帝踐極令皇太子就周致仕柱國闡慶第問疾仍供醫藥之費

煬帝大業五年二月丙辰宴耆舊四百人於武德殿頒賜各有差

十月癸亥詔曰優德尚齒載之典訓尊事乞言義彰昭序鬻熊爲乘取非筋力方叔元老克壯其猷朕永言稽古用求至治是以龐眉黃髮更令收序務簡優秩無虧藥膳庶其卧治佇其弘益今歲耆老赴集者

可於近郡處置年七十以上疾患沉滯不堪居職即給賜帛送還本郡其官至七品以上者量給祿廩以終厥身

六年四月帝在江都宮宴江淮以南父老頒賜有差七年二月詔曰今往涿郡巡撫民俗其河北諸郡及山西山北年九十以上者板授太守八十者授縣令唐高祖武德三年幸稷州召父老置酒高會賜帛

五年三月宴京城父老賜帛

太宗貞觀三年四月詔高年八十以上粟二石九十以上三石百歲加絹二疋

十月幸隴州詔岐隴二州八十以上賜物百歲以上尤加優恤

五年十二月幸溫湯新豐賜高年帛

六年三月幸九成宮八十以上賜粟帛

五月宴岐州父老賜帛

九月幸慶善宮賜故老帛

十一年正月宴長安父老於玄武門賜以穀帛

三月幸洛陽宮宴父老於乾元殿賜以粟帛

是年車駕在雒陽幸甄權宅禮高年也權潁州人精曉藥術為天下之最時年一百三歲拜朝散大夫賜

以粟帛被褥几杖因詔百歲以上者給侍五人

十二年二月宴雒陽父老賜帛有差

十三年正月朝於獻陵三原縣人年八十以上賜物有差

十四年正月幸魏王宅賜同里老人物有差

十五年正月如雒陽所過州賜高年穀帛

五月并州父老請臨幸帝賜宴於武成殿仍賜物遣之

十一月蒐於伊闕詔所經之縣遣使存賜高年賜帛各有差

十七年六月并州父老詣闕賀皇太子疏爵晉藩賜宴及物以遣之

十一月以貞石表瑞制男子年七十以上量給酒米

十八年正月癸卯將以征高麗宴雍州父老百歲以

上氈被袍各一帛十疋粟十石九十以上物五段粟

五石八十以上物三段粟一石

十一月壬申至雒州遣使齎璽書詣鄭汝懷澤四州

問高年宴賜各有差壬午宴雒州父老一百九十人

於儀鸞殿班賜有差

十九年二月發雒陽經遼所經州縣高年賜粟帛幸

行次河陽女子呂年百歲太宗幸其宅存問之賜氈
帛袍各一綿帛十段次汲縣女子翟張並年百歲太

宗幸其宅存問之賜物如河陽

三月次平棘張道鴻之廬賜以衣服道鴻性鄙野無
他事行少時嘗遊名山得服食之訣居人間每餌金

膏時年百四十六歲

十月次營州召父老年七十以上賜繒帛綾錦等

二十年幸并州引太原父老宴之賜物有差

二月發并州賜所過高年粟有差

七月幸靈州賜高年粟帛有差

八月丁卯見京城父老於北闕賜食及粟帛

二十二年三月至玉華宮賜所過高年粟帛

二十三年五月以甘雨賜天下八十以上粟帛

高宗永徽六年十月立武氏為皇后赦天下八十以

上老人各賜粟二石帛二段百歲以上各賜粟五石

帛十段

顯慶元年正月辛未立皇太子赦諸年八十以上各

賜粟帛已卯宴京城老人八十以上賜物各有差

二年二月幸雒陽父老百歲以上賜氈被一具袍一

領絲絹十段粟二十石仍遣使就家存問九十以上

各賜絲絹五段十月幸鄭州賜八十以上老人粟帛有差

閏十二月以駕幸東都詔所經處八十以上老人賜氈袍綿及粟有差
五年三月幸并州老人年八十以上板授刺史縣令并賜氈被粟帛各有差
龍朔元年九月駕幸河南縣婦人張氏年一百三歲遂賜絹三十疋氈被一具皇后太子亦親問賜以衣物及繒絲
乾封元年正月改元詔諸老人八十以上者假授刺

史司馬量賜粟帛

總章二年九月幸岐州賜高年衣服粟帛

咸亨元年十一月將幸東都宴京城父老有不能行者仍許子弟扶至殿庭仍節級賜物及黃帔而遣之上元三年三月自汝州溫陽還賜八十以上老人帛弘道元年二月大赦天下老人百歲以上者板授下州刺史婦人板授郡君九十以上者板授上州司馬婦人板授縣君八十以上者板授縣令婦人量賜粟帛

睿宗太極元年正月籍田大赦賜老人年九十以上

板授下州刺史緋衫牙笏八十以上板授上州司馬
綠衫木笏

玄宗開元二年九月引京師侍老宴於含元殿庭詔
曰古之爲政先於尚老居則致養禮傳三代行則就
見制問百年蓋皇王之勸人教黎庶之爲子朕寅奉
休曆祗膺聖謨因秋歸而歲成屬星見於郊祀念其
將至尤重乞言俾伸恩於几杖期布惠於鄉國九十
以上宜賜几杖八十以上宜賜鳩杖所司準式天下
諸州侍老宜令州縣遂穩便設酒食一准京城賜几
杖其婦人則送几杖於其家

三年十月詔古者親問百年義在養老其侍年老九
十以上并篤疾各賜物四段綿帛各一疋

十一年正月車駕幸北都詔太原府父老八十以上
賜物五段板授上縣令賜緋婦人板授上縣君九十
以上賜物七段板授上州長史賜緋婦人板授郡君
百歲以上賜物十段板授上州刺史賜紫婦人板授
郡君夫人

十一月親祠南郊禮畢大赦詔百歲老人賜帛五段
粟五石縣令至其家存問給付

十三年十月東巡至濮州河南河北五百里內父老

各賜帛二疋十一月封禪禮畢徐曹亳汴許仙豫等州父老各賜帛二疋十二月至東都京兆父老拜賀各賜帛以遣之

十五年詔曰吏部選人有衰老不堪釐務者優其資致仕量賜多少粟帛

十七年十一月詔諸州侍老百歲以上賜綿帛十段九十以上賜五段八十以上賜三段

二十年十月祠后土畢詔天下侍老百歲以上賜粟五石八十以上三石

二十二年正月籍田禮畢詔天下侍老百歲以上板

授上州刺史九十中州刺史八十上州司馬七十

上所繇量給酒肉各令存問

二十四年八月千秋節召京兆父老宴敕並宜坐食訖樂飲兼賜物

二十六年七月册皇太子大赦詔天下侍老八十以上賜粟三石帛三疋百歲以上賜粟五石綿帛五疋並假板授

二十七年二月加尊號大赦詔天下侍老百歲以上板授下州刺史婦人板授郡君賜粟五石絹帛五疋九十以上板授州司馬婦人板授縣君粟三石絹

三段八十以上板授鄉君粟二石綿帛二段

天寶元年正月改元詔天下侍老八十以上者宜

縣官每加存問仍量賜粟帛侍丁者令其養母孝

者矜其在喪此王政優容俾伸情理而官吏不依令

式多雜役使自今已後更不得然

三載十二月祀九宮貴神禮畢詔天下侍老百歲以

上賜綿帛五段粟三石八十以上三段粟二石

六載正月親祠南郊禮畢詔天下侍老百歲以上賜

綿帛五段粟三石八十以上綿帛三段粟二石仍令

長官存問

七載五月加尊號詔京城父老各賜物十段七十以

上板授本縣令其妻板授縣君六十以上板授本縣

丞天下侍老百歲以上板授下郡太守婦人板授郡

君九十以上板授上郡司馬婦人板授縣君八十以

上板授縣令婦人板授鄉君仍賜酒麴

八載閏六月冊尊號禮畢詔高年給屬存養因時定

式務廣仁恩其天下百姓丈夫七十五以上婦人七

十以上宜各給一人充侍仍自簡擇至八十以上依

嘗式處分

十載正月親祠南郊禮畢詔天下侍老百歲以上賜

綿帛五段粟五石八十以上綿帛三段粟三石丈夫七十以上婦人七十以上絹帛五段粟二石

十三載二月冊尊號禮畢詔天下侍老百歲以上板授本郡太守婦人板授郡夫人各賜綿帛五段粟三石八十以上板授本縣令婦人板授縣君各賜綿帛二段粟二石

肅宗至德元年卽位於靈武詔曰天下耆壽各賜物五段侍老板授太守縣令仍各賜物五段

二年十二月赦詔天下侍老八十以上板授有差並賜緋魚袋授太守縣令

上元二年赦詔天下侍老未板授者與板授

代宗廣德二年二月親祠南郊禮畢大赦詔天下侍老九十以上板授刺史七十以上板授上佐縣令德宗興元元年六月發興元詔本府耆老與板授本縣令仍賜緋

貞元五年四月以太子少傅兼禮部尚書蕭昕爲工部尚書前太子少詹事常建爲秘書並致仕仍給半祿料後受致仕官者並宜准此舊例給半祿及賜帛其俸料悉絕帝念歸老之臣特命賜其半焉致仕官給半祿自昕等始也

順宗即位初大赦百姓九十以上板授及賜各有差仍令官吏就家存問

憲宗元和元年正月詔天下百姓高年賜米帛羊酒十四年七月册尊號大赦委中書門下選黜陟使分巡天下百姓高年者頒賜有差

穆宗以元和十五年正月即位十一月令鄭覃往鎮州宣慰其四州之內有高年不能自存者就給粟帛長慶元年正月郊祀禮畢赦制天下百姓高年者賜粟及綿絹有差

三月以盧龍軍節度使劉總歸詔管內高年不能自

存差官就問給賜粟帛

臣欽若等曰唐自武宗已後無實錄故事多闕

後唐莊宗同光元年四月即位制曰應諸道管內有高年踰百歲者便與給復永俾除各自八十至九十者與免一子免役州縣不得差徭

十月德音有年過八十者免一子從征

明宗天成二年十月辛丑詔曰敬老之規前王所重養親之道為子居先應有年八十以上及家長有廢疾者宜免一丁差役俾遂奉養

晉高祖天福二年四月丁亥制曰洪荒之內鄉黨之中宜弘養老之規式表問年之道天下百姓有年八

十以上者與免一丁差徭仍令逐處簡署上佐官
六年八月帝幸鄴都制管内耆老八十以上者並與
板授上佐

周太祖廣順二年十一月左監門衛上將軍李建崇
右神武大將軍安伸左領軍將軍慕容業右領衛將
軍劉彥章各賜紫歛正錦袍金塗銀束帶建崇等皆
年七十餘太祖以舊將累爲刺史留後老君班列故
有是賜仍令每日內殿起居退就公食

冊府元龜

